

古今圖書集成

理學彙編 經籍典

中華書局

已司書記

理學彙編 經籍典

古今圖書集成

中華書局 已卯書社

子而博士鄭寬中以尚書授太子薦言禹善論語詔令禹授太子論語由是遷光祿大夫

成帝建始 年鄭寬中張禹朝夕入說論語于金華殿

按漢書成帝本紀不載 按開府元龜成帝時班伯少受詩于師丹大將軍王鳳薦伯宜勸學召見宴昵殿容貌甚麗誦說有法拜為中常侍帝方鄉學鄭寬中張禹朝夕入說尚書論語于金華殿詔伯受焉既通大義又講異同于許商遷奉車都尉數年金華之業續出此條一作武帝初故附建始內

平帝元始五年徵天下以論語教授者駕一封轡傳造詣京師

按漢書平帝本紀元始五年春正月徵天下通知逸經古記天文歷算鍾律小學史篇方術本草及以五經論語孝經爾雅教授者在所為駕一封轡傳造詣京師至者數千人

後漢

光武帝建武 年以包咸入授皇太子論語

按後漢書光武帝本紀不載 按儒林包咸傳建武中入授皇太子論語又為其章句拜諫議大夫

和帝永元十四年徐防請論語不宜射策

按後漢書和帝本紀不載 按徐防傳永元十四年拜司空防上疏曰臣以為博士及甲乙策試宜從其家章句開五十難以試之解釋多者為上第引文明者為高說若不依先師文有相伐皆正以為非五經各取上第六人論語不宜射策雖所失或久差可矯革詔書下公卿皆從防言

靈帝熹平四年刻石經論語立于太學門外

按後漢書靈帝本紀熹平四年春三月詔諸儒正五經文字刻石立于太學門外

按洛陽記太學在洛城南開陽門外講堂長十丈廣一丈堂有石經四部本碑凡四十六枚西行尚書周易公羊傳十六碑存十二碑毀南行禮記十五碑悉崩壞東行論語三碑一碑毀禮記碑上有諫議大夫馬日碑議郎蔡邕名

魏

少帝正始二年三月帝講論語通使太常釋奠祀孔子

按三國志魏書少帝本紀不載 按宋書禮志魏齊王正始二年帝講論語通使太常釋奠以太牢祀孔子於辟雍以顏淵配

晉

武帝太康三年皇太子講論語通親釋奠祀孔子 按晉書武帝本紀不載 按宋書禮志晉武帝太康三年皇太子講論語通太子親釋奠以太牢祀孔子于辟雍以顏淵配

元帝太興三年皇太子講論語通親釋奠祀孔子

按晉書元帝本紀不載 按宋書禮志晉元帝太興三年皇太子講論語通太子親釋奠以太牢祀孔子以顏淵配

恭帝元熙二年劉超授帝論語

按晉書恭帝本紀不載 按劉超傳恭帝年八歲雖幽厄之中超猶授孝經論語

宋

明帝泰始 年續註論語二卷

按宋書明帝本紀帝少好讀書愛文義續衛瓘所註論語二卷行于世

陳

世祖天嘉元年令沈文阿于東宮講論語

按陳書世祖本紀不載 按儒林沈文阿傳世祖即位遷通直散騎常侍兼國子博士領羽林監仍令于東宮講孝經論語

宣帝太建五年勅周弘正侍東宮講論語

按陳書宣帝本紀不載 按周弘正傳太建五年授尚書右僕射祭酒中正如故尋勅侍東宮講論語孝經太子以弘正朝廷舊臣德望素重於是降情禮禮橫經請益有師資之益焉

太建十一年春皇太子幸太學詔新安王於辟雍發論語題

按陳書宣帝本紀不載 按文學徐伯陽傳太建十一年春皇太子幸太學詔新安王於辟雍發論語題仍命伯陽為辟雍頌甚見嘉賞

唐

高宗儀鳳三年詔貢舉人論語任依常式

按唐書高宗本紀不載 按舊唐書禮儀志儀鳳三年五月詔自今已後道德經並為上經貢舉人皆須兼通其餘經及論語任依常式

元宗開元六年褚無量獻論語

按唐書元宗本紀不載 按儒學褚無量傳帝西還皇太子及四王未就學無量以孝經論語五通獻帝帝曰朕知之矣乃選鄒常亨郭謙光潘元祚等為太

子諸王侍讀

肅宗寶應二年楊綰上疏請以論語為兼經

按唐書肅宗本紀不載 按選舉志寶應二年禮部

侍郎綰上疏請所習經取大義聽通諸家之學每問

經十條對策三道皆通為上第吏部官之經義通八

策通二為中第與出身下第罷歸論語孝經孟子兼

為一經

代宗大曆八年歸崇敬請博士兼通論語

按唐書代宗本紀不載 按歸崇敬傳大曆八年崇

敬建議曰近世明經不課具義先取帖經禮門廢業

傳授義絕請以禮記左氏春秋為大經周官儀禮毛

詩為中經尚書周易為小經各置博士一員公羊穀

梁春秋其準一中經通置博士一員博士兼通孝經

論語依章疏講解德行純潔文詞雅正形容莊重可

為師表者委四品以上各舉所知在外給傳七十者

安車蒲輪敦遣國子太學四門三館各立五經博士

品秩生徒有差禮部考試法請罷帖經于所習經問

大義二十而得十八論語孝經十得八為通

文宗太和七年創立石經論語

按唐書文宗本紀不載 按會要太和七年十二月

勅于國子監講論堂兩廊創立石九經并孝經論語

爾雅共一百五十九卷字樣四十卷

宋

太祖開寶五年判監陳鄂等校論語釋文上之

按宋史太祖本紀不載 按玉海開寶五年判監陳

鄂與姜融等四人校孝經論語爾雅釋文上之

真宗咸平三年詔邢昺等校定論語義疏

按宋史真宗本紀不載 按邢昺傳咸平二年始置

翰林侍講學士以昺為之受詔與杜鎬舒雅孫奭李

纂清崔偓佺等校定周禮儀禮公羊穀梁春秋傳孝

經論語爾雅義疏及成並加階勳

按玉海李至請命李沆杜鎬等校定周禮儀禮公羊

穀梁傳疏及別纂孝經論語正義咸平三年三月癸

巳命祭酒邢昺代領其事杜鎬舒雅李維孫奭李纂

清王煥崔偓佺劉士元領其事論語取梁皇侃疏約

而修之按傳作二年玉海作三年蓋是年開為

咸平四年九月邢昺等表上重校定論語

按宋史真宗本紀不載 按玉海咸平四年九月翰

林侍講學士邢昺等及直講崔偓佺表上重校定周

禮儀禮公羊穀梁傳孝經論語爾雅七經義疏凡一

百六十五卷賜宴國子監另加一階餘遷秩一本云

三十月命摹印頒行於是九經義疏具矣 又云

邢昺等撰論語正義咸平中頒其書于章句訓詁名

器事物之際詳矣

大中祥符五年作崇儒術為君難為臣不易二論刻

石國學

按宋史真宗本紀大中祥符五年十月辛酉作崇儒

術論刻石國學 按陳彭年傳真宗謂之曰儒術汗

隆其應實大國家崇替何莫由斯故秦衰則經籍道

息漢盛則學校興行其後命歷迭改而風教一揆有

唐文物最盛朱梁而下王風浸微太祖太宗不變敝

俗崇尚斯文朕獲紹先業謹導聖訓禮樂交舉儒術

化成實二后垂裕之所致也為君之難由乎聽受臣

之不易在乎忠直其君以寬大接下臣以誠明奉上

君臣之心皆歸于正直道而行至公相遇此天下之

達理先王之成憲曾指諸掌孰謂難哉彭年曰陛下

聖言精詣足使天下知訓伏願躬演睿思著之篇翰

真宗為製崇儒術為君難為臣不易二論示之彭年

復請示輔臣刻石國子監

乾興元年十一月辛巳命侍講孫奭馮元講論語

按宋史真宗本紀不載 按仁宗本紀真宗乾興元

年十一月辛巳初御崇政殿西閣講筵命侍講孫奭

馮元講論語

仁宗天聖四年侍讀學士宋綬進論語要言

按宋史仁宗本紀不載 按玉海天聖四年閏五月

侍讀學士宋綬錄惟皇誠德賦孝經論語要言唐太

宗帝範二卷開元中楊浚聖典三卷楊相如君臣政

理論三卷以進時常好儒學太后命綬擇前代文字

資孝養補政治者以備帝覽故也

皇祐元年九月所鐫石室十三經工畢論語張德鈞

書

按宋史仁宗本紀不載 按玉海石室十三經孟蜀

所鐫皇祐元年歲次己丑九月辛卯朔十五日乙巳

工畢論語爾雅張德鈞書

至和元年詔至克繼臨蔡邕古文法為論語

按宋史仁宗本紀不載 按宗室魏悼王廷美傳循

國公子克繼善楷書九工篆隸宗正薦之仁宗親臨

試及令臨蔡邕古文法為論語詩書復詔與朝士分

隸石經帝曰李陽冰唐室之秀今克繼族之陽冰也

嘗進所集廣韻字源帝稱善藏之

至和二年三月判國子監王洙以石經論語見書鐫

未就乞促近限畢工九月皇姪克繼寫石經論語畢上之

按宋史仁宗本紀不載 按玉海仁宗命國子監取

易詩書周禮禮記春秋孝經爲篆隸二體刻石兩楹

至和二年三月五日判國子監王洙言國子監刊立

石經至今一十五年止孝經刊畢尚書論語見書鐫

未就乞促近限畢工餘經皆罷從之 又云至和元

年皇姪克繼所寫石經論語求書石國子監二年九

月十五日工畢上之賜銀幣

神宗熙寧 年始以論語置學官

按宋史神宗本紀不載 按朱子論語要義目錄序

至道咸平間命翰林學士邢昺等取皇甫疏約而

修之以爲正義其於章句訓詁名器事物之際詳矣

熙寧中神祖垂意經術始置學官以幸學者

元豐八年十二月經筵講魯論

按宋史神宗本紀不載 按哲宗本紀神宗元豐八

年十二月壬戌開經筵講魯論三朝寶訓

哲宗元祐二年呂公著范祖禹等進論語要語

按宋史哲宗本紀不載 按玉海元祐二年九月庚

午呂公著言伏觀今月十五日以經筵講論語畢賜

執政及講筵官御筵是日內出御書唐賢律詩分賜

臣等各一篇次日臣于延和謝今論語終快進講尚

書二書皆聖人之格言爲君之要道臣輒于尚書論

語孝經中節取要語凡一百段惟取明白切于治道

者庶便覽他日太皇太后宣諭公著曰所進尚書

論語等要義百篇皇帝每日書寫看覽甚有益學問

范祖禹又言臣謹節尚書論語孝經切要之語訓戒

之言得二百一十九事以備聖札所冀手書之目觀之心存之以助聖德之萬一名曰三經要語

元祐 年范祖禹進論語說

按宋史哲宗本紀不載 按玉海范祖禹論語說元

祐中所進數引劉敞程頤之說

紹聖元年國子司業龔原諒以王雱論語義刊板傳

學者

按宋史哲宗本紀不載 按龔原傳紹聖初召拜國

子司業請以王安石所撰字說洪範傳及子雱論語

孟子義刊板傳學者故一時學校舉子之文靡然從

之其敝自原始

高宗建炎二年前上寫論語于絹屏

按宋史高宗本紀不載 按玉海建炎二年九月己

亥上謂輔臣曰近將語孟治道處手寫入于絹屏又

曰語孟習之熟真有可嘉

紹興七年詔給尹焞筆札解論語以進

按宋史高宗本紀不載 按尹和靖年譜紹興七年

閏十月初八日奉聖旨尹焞除秘書郎兼崇政殿說

書辭不允令先次朝見赴講筵供職十二日入見力

辭于上前上曰朕渴卿久矣卿從程頤學俟卿以

講學不敢以有他遂供職講筵承續講衛靈公之末

章稱旨遂給筆札解論語以進

紹興八年四月尹焞進所解論語賜六品服

按宋史高宗本紀不載 按尹和靖年譜紹興八年

二月二十七日除秘書少監仍兼崇政殿說書每當

赴講之日前一夕必沐浴更衣以所講書置案上朝

服再拜齋于燕室學者問之先生曰必欲以所言感

悟君父安得不敬人君其尊如天必須盡己之誠意

吾言得入則天下蒙其利不能入則反之又安得不

敬十三日詔促解論語四月十七日又於經筵求去

翌日上諭參知政事劉公大中曰尹焞學問淵源足

爲後學矜式班列中得老成人爲之領袖亦足以見

朝廷氣象十八日除徽猷閣直學萬壽觀依舊兼崇

政殿說書二十日進呈所解論語五月四日詔賜緋

衣銀魚

按尹和靖文集先生曰某在經筵進論語解別無可

取只一篇序却是某意曰學貴力行不貴空言若欲

意義新奇文辭華贍則非臣所知此是某意 先生

既進論語解一日德壽忽謂趙丞相曰朕看尹某日

間所行全是一部論語趙曰陛下可謂知人矣

按玉海紹興中尹焞爲崇政殿說書八年四月戊寅

詔尹焞解論語書成賜六品服

紹興十三年正月以王質論語口義送史館十一月

上寫論語畢刊石國學

按宋史高宗本紀不載 按玉海紹興十三年正月

二十四日王質進父實論語口義送史館 又云繫

年錄云紹興十三年十一月丁卯上寫六經論語孟

子畢泰檜因請刊石國學仍頒墨本賜諸路州學詔

可

紹興十六年五月上書論語刊石立于太學

按宋史高宗本紀不載 按玉海紹興十六年五月

上書論語孟子皆刊石立于太學首善閣及大成殿

後三禮堂之廊廡四年刊 紹興二十四年十二月命段程瑀論語講解

按宋史高宗本紀紹興二十四年十二月以故龍圖閣學士程瑀有論語講解秦檜疑其識已知饒州洪興祖嘗爲序京西轉運使魏安行鏤板至是命毀之與祖韶州安行欽州編管瑀子孫亦論罪

孝宗淳熙五年張栻上論語二十篇
按宋史孝宗本紀不載 按玉海淳熙五年六月九日軍器少監張栻上論語拾遺二十篇付秘閣

金

熙宗皇統元年二月戊午上親祭孔子廟自是讀論語

按金史熙宗本紀皇統元年二月戊午上親祭孔子廟北面再拜謂侍臣曰朕幼年遊佚不知志學歲月逾邁深以爲悔孔子雖無位其道可遵使萬世景仰自是頗讀尚書論語諸書或以夜繼焉 按孔璠傳詔求孔子後加璠承奉郎襲封衍聖公奉祀是時熙宗頗讀論語尚書春秋左氏傳及諸史乙夜乃罷

廢帝天德三年置國子監論語用何晏集註邢昺疏自國子監印板授諸學校

按金史廢帝本紀不載 按選舉志凡養士之地曰國子監始置于天德三年論語用何晏集註邢昺疏自國子監印之授諸學校

世宗大定二十三年九月使譯經所進所譯論語按金史世宗本紀大定二十三年九月己巳使譯經所進所譯易書論語孟子等書命頒行之

元
世祖至元五年勅從臣錄論語按元史世祖本紀至元五年十月庚寅勅從臣充思

忽等錄毛詩論語孟子至元二十四年定國子學制凡讀書必先論語按元史世祖本紀不載 按選舉志至元二十四年立國子學而定其制凡讀書必先孝經小學論語博士助教親授句讀音訓正錄伴讀以次傳習之講說則依所讀之序
文宗天曆元年廉訪使鄭允中表金履祥所著論語集註考證上于朝
按元史文宗本紀不載 按儒學金履祥履祥所著書曰論語孟子集註考證十七卷門人許謙爲益加校定天曆初廉訪使鄭允中表上其書于朝

明
世宗嘉靖二年御文華殿講官倫以訓進講論語按春明夢餘錄嘉靖二年御文華殿講官倫以訓進講論語陽膚爲士師講義上批云以訓講哀矜勿喜云是慈悲憐憫夫慈悲二字是釋氏之教也
懷宗崇禎三年文震孟進講論語
按明外史文震孟傳崇禎改元召爲侍讀改左中允充日講官三年進諭德直講如故震孟在講筵最嚴正嘗諍君使臣以禮章反覆規諷帝即出尚書喬允升侍郎胡世賞于獄
崇禎十五年八月講官丘瑜等進講論語
按春明夢餘錄崇禎十五年八月二十四日日講詹事丘瑜進講論語至師塾之始章帝問成英詔漢瑜對是四代樂名上曰子在齊聞韶樂瑜對即此韶樂上復問問雅之亂亂字瑜對是樂之章章上曰當時夫子聞韶三月不知肉味是何等氣象九月十八日

上日講講官講論語子罕言利一節帝召輔臣前問夫子論仁如欲立欲達克己復禮天下歸仁及出門使民等語言仁儘多何云罕言輔臣延儒對此卽性與天道不可得聞之意德瑛對聖人未嘗不言仁只門弟子悟者以爲言不悟者以爲罕言耳又問命與仁如何分別德瑛對總是一理在天爲命在心爲仁帝首肯一日克己復禮天下歸仁便是修己以安百姓意思輔臣極贊以爲聖見明徹吳姓言帝王學問只是明德新民德瑛言明明德於天下便是天下歸仁天日手諭先生等論仁諸說深當朕心著卽撰寫進呈以便觀覽

論語部彙考二

晉何晏論語集解十卷

按晏等進論語集解序漢中壘校尉劉向言魯論語二十篇皆孔子弟子記諸善言也太子太傅夏侯勝前將軍蕭望之丞相韋賢及子元成等傳之齊論語二十二篇其二十篇中章句頗多于魯論琅邪王卿及膠東庸生昌邑中尉王吉皆教授故有魯論有齊論魯共王時嘗欲以孔子宅爲宮壞得古文論語齊論有問王知道多于魯論一篇古論亦無此二篇分

堯曰下章子張問以爲一篇有兩子張凡二十一一篇次不與齊魯論同安昌侯張禹本受魯論兼講齊說善者從之號曰張侯論爲世所貴包氏周氏章句出焉古論惟博士孔安國爲之訓解而世不傳至順帝時南郡太守馬融亦爲之訓說漢末大司農鄭元就魯論篇章考之齊古爲之註近故司空陳羣太常王肅博士周生烈皆爲義說前世傳授師說雖有異同不爲訓解中間爲之訓解于今多矣所見不同互有得失今集諸家之善記其姓名有不妥者頗爲改易名曰論語集解光祿大夫關內侯臣孫邕何晏等上

唐陸德明論語釋文一卷

按德明自序論語者孔子應答弟子及時人所言或弟子相與言而接聞於夫子之語也當時弟子各有所記夫子既終微言已絕弟子恐難居已後各生異見而聖言永滅故相與論撰因輯時賢及古明王之語合成一法謂之論語鄭康成云仲弓子夏等所撰定漢興傳者則有三家魯論語者魯人所傳即今所行篇次是也常山都尉龔奮長信少府夏侯勝丞相韋賢及子元成魯扶卿太子少傅夏侯建前將軍蕭望之竝傳之各自名家齊論語者齊人所傳別有問王知道二篇凡二十二篇其二十篇中章句頗多於魯論昌邑中尉王吉少府宋畸琅邪王卿御史大夫貢禹尚書令五鹿充宗膠東庸生竝傳之唯王陽各家古論語者出自孔氏壁中凡二十一一篇有兩子張如淳云分堯曰篇後子張問何如可以從政以下爲篇名曰從政

篇次不與齊魯論同
新論云文異音四百餘字

孔安國爲傳後漢馬融亦注之安昌侯張禹受魯論於夏侯建又從庸生王吉受齊論擇善而從號曰張侯論最後而行於漢世禹以論授成帝後漢包咸子長吳人周氏何人竝爲章句列於學官鄭元就魯論張包周之篇章考之齊古爲之注焉魏吏部尚書何晏集孔安國包咸周氏馬融鄭元陳羣字長文穎川人魏司空王肅周生烈之說并下己意爲集解正始中上之盛行於世今以爲主微從人七錄云字文選本姓唐號博士傳中唐韓愈論語筆解一卷

按金玉節序韓先生誠不愧一代大儒哉昔自秦火

既熾聖道幾微逮漢世表章六經名儒迭出其於易詩書禮樂春秋外郎及論語孝經以二書皆出孔壁中爲門人之所親承聖人之提命以有此書而論語所記尤爲巨細畢該精粗共貫自一言一笑以至朝廟聘享之大性命天道之精無不究其淵微皆匹夫匹婦之所能知能行而實爲千百世聖人之所不能盡也以故漢儒論著最詳自魏晉以後何晏集解而外嗣言寥寥幾爲絕響已先生起八代之衰迴瀾障川使孔孟之遺緒得以不墜凡其發爲文章者皆根據六經排斥百氏一以孔孟爲宗使洙泗心源得以不絕於有唐一代之者先生之力也今觀其筆解一書大抵皆就孔安國包咸馬融鄭元諸君子所已解者而推其所未到駁其所未安雖其所解者參之以宋儒之說尚爲未愜而要其用心之精微總無非欲爲聖經之羽翼漢儒之糾繩也先生真不愧一代大儒

矣哉敢拜手以序其後後學江都金玉節書
宋尹焞論語解 卷

按焞進論語解序臣自布衣入侍經筵被旨解論語以進臣備職勸講不敢以寡陋辭竊惟是書遇集記孔子嘉言善行苟能即其問答如親炙于聖人之門然默識心受而躬行之則可謂善學矣後之解其文義者數千百家俾臣復措說其下亦不過稱贊而已恭惟陛下聖學高明出乎天縱如舜好問如湯日新舉賢而遠不仁修己以安百姓固以合符乎夫子之道施之于事業矣復何有待于臣之說然而學貴于力行不貴空言若欲意義新奇文辭華贍則非臣所知也姑撫所聞以稱明詔臣謹上

按焞又序

孔子以來道學屢絕言語文字去本益賒是故先王遺書雖以講讀而傳或以解說而陋見其所論所趨不無差謬豈惟無益害有甚焉脫使窮其根源謹其辭說苟不踐行等爲虛語此先賢所以重講解慎言辭也況如臣者材質甚愚修爲無取施之于己未見其功挾以事君亦將何有其於聖賢言行何足以窺不測奧妙發明指歸疆顏爲之第塞詔旨臣無任慚羞恐懼之至
按焞題後焞紹興七年十一月被召到闕賜對押赴經筵承續講說論語衛靈公之末一章次日有旨給筆札解論語以進念以說書爲職不敢以固陋辭方以病困始蒙賜寬假病安日解進明年二月駕還錢塘焞以病從百司先行三月病少愈力疾日赴經筵是月十三日詔促成書以進時手顫目昏心思荒錯深懼稽命之久遂勉強爲之姑塞上命四月二十一

日進至而學者郝寬呂稽中堅中在焉書成皆三子之助也九年春復病丐歸蒙恩授以閑祿聽其自便遂寓居平江府虎丘寺之西庵寬從余居上方暇日見此帙云當時潛錄欲終身誦之甚矣其嗜學也相從既久若是書也講亦熟矣豈不知此一時應詔而成皆前人成說雖有一二臆見坐以老病拙訥心之精微詞不能達今取觀之徒有愧汗尤聖不云乎吾無行不與二三子者是丘也煇於諸公亦然何用此爲寬復請藏之因識始末併戒其勿以示人幸諒區區之意冬至後一日書于三畏齋

按韓元吉跋和靖先生論語解詞極簡嚴將俾學者深味其旨而有所自得也乾道庚寅歲元吉憂居上饒遇先生門人王德修問此書亡恙且曰子異時官守不刊行之耶元吉于是愧其言會明年行將官中都度未可輟也乃以舊年兄弟手所抄付于故人趙德莊于建安庶可成焉昔和靖嘗云某從伊川先生學易時伊川出易傳七十餘家和靖茫然不知所入伊川曰日觀一文可也繼有所質問伊川色莊而氣嚴未嘗語也或曰未也姑求之己而意有所會伊川始忻然爲之剖析諸傳而伸以己說蓋終身不忘也故其誨人亦欲如此此書所以簡嚴者歟某年某月頴州韓元吉記

楊時論語解二卷

按時自序學者之視聖人其猶射之于正鵠乎雖巧力所及有遠近中否之不齊然未有不志乎正鵠而可以言射也士之去聖人或相倍蓰或相什百所造固不同然未有不志乎聖人而可以言學也道廢千

有餘年百家之言盈天下學者將安取正乎質諸聖人而已矣夫論語之書孔子所以告其門人羣弟子所以學于孔子者也聖學之傳其不在茲乎然而其言近其指遠世儒以其近也易之以爲童子之習而莫之究入德之途背而去之如在荒墟之中曾無迷廬以託宿焉况能宅天下之廣居乎善夫伯樂之論馬也以爲天下馬不可以形容筋骨相視其所視而遺其所不視則馬之絕塵弭轍者無遺矣余於是得爲學之方焉夫道之不可言傳也審矣士欲窺聖學淵源而區區于章句之末是猶以形容筋骨而求天下馬也其可得乎余于是書也于牝牡有不知蓋多矣學者能視其所視而遺其所不視則於余言其庶矣乎

丘子野論語纂訓一篇

按朱熹序論語纂訓書無第卷合一篇凡古今論語訓義見錄者十四家而大抵宗程氏蓋熹外兄丘子野所述子野亦以意附見其是非取舍之說熹讀之其不合于聖人者寡矣因爲序論曰士生乎聖人既沒數千百歲之下而欲明聖人之心于數千百歲之上推其立言垂訓之旨約其辭義于衆說紛亂之中以爲一家之書而又欲其是非取舍不謬于聖人亦難矣蓋聖人之書其爲意微其爲辭約苟不明乎其宗而識乎其本多見其以私見臆說亂之也昔之大儒其猶有不免乎此者况後世之紛紛乎此其所以難也抑又有甚難者焉孔子曰文莫吾猶人也躬行君子則吾未之有得此其所以爲其難者也夫其所以難者如此所以爲其難者又如此則是書之作亦

將明乎其所難者求至乎其難而已其可已乎故其求之能博取之能審推是言之其實過矣孟子曰博學而詳說之將以反說約也此之謂已如是則後聖人數千百歲而生而欲明其心于數千百歲之上無難矣大學之所以盡其心如此又安有放其邪心以窮乎外物之思哉其行之也不遠矣則其所以爲其難者又得而庶幾焉熹是以樂道之而爲之序所以明子野之爲是書其難如此而亦以著其從事于聖人者不易焉紹興三十二年十月十八日序

張栻論語解 卷

按栻自序學者學乎孔子者也論語之書孔子之言行莫詳焉所當終身盡心者宜莫先乎此也聖人之道至矣而其所以教人者大略則亦可賂焉蓋自始學則教之以爲弟爲子之職其品章條貫不過于聲氣容色之間涵濡應對進退之事此雖爲人事之始然所謂天道之至隨者初亦不外乎是聖人無隱乎爾也故當其始則有致知力行之地而極其終則有非思勉之所能及者亦貴于行著習察盡其道而已矣孔子曰道之不行也我知之矣知者過之愚者不及也道之不明也我知之矣賢者過之不肖者不及也秦漢以來學者失其傳其間雖或有志于力行而其知不明槌塗索塗莫適所依以卒背于中庸本朝河南君子始以窮理居敬之方開示學者使之于致知力行有所循守以入堯舜之道然近歲以來學者又失其旨汲汲求所謂知而于躬行則忽焉本之不力故其所知特出于臆度之見而無以有諸躬識者蓋憂之此特未知二者互相發之故也孔子曰學而

不思則罔思而不學則殆歷放聖賢之意蓋欲使學者于此二端兼致其力始則據其所知而行之行之力則知愈進知之深則行愈達是知嘗在先而行未嘗不隨之也知有精粗必由粗以至精行有始終必自始以及終內外交正本末不遺條理如此而後可以言無弊然則聲氣容色之間洒掃應對進退之事乃致知力行之原也其可舍是而他求乎顧杖何足以與明斯道輒因河南餘論推以已見輯論語說為同志者切磋之資而又以此序冠于篇首焉乾道九年五月壬辰朔廣漢張枋序

宋朱熹論語要義 卷

按嘉自序魯論語二十篇古論語二十一篇

張問別一篇魯共王 齊論語二十二篇

何晏等集漢魏諸儒之說就魯論篇章考之齊古為

之註本朝至道咸平間又命翰林學士邢昺等取皇

甫偏疏約而修之以為正義其于章句訓詁名器事

物之際詳矣熙寧中神祖垂意經術始制學官以幸

學者而時相父子逞其私智盡廢先儒之說妄意穿

鑿以利誘天下之人而塗其耳目一時文章豪傑之

士蓋有知其是非而傲然不為之下者顧其所以為

說又未能卓然不叛于道學者趨之是猶舍夷貉而

適戎蠻也當此之時河南二程先生獨得孟子以來

不傳之學于遺經其所以教人者亦必以是為務然

其所以言之者則異乎人之言之矣嘉年十三四時

受其說于先君未通大義而先君棄諸孤中間歷訪

師友以為未足於是備求古今諸儒之說合而編之

穿鑿支離者固無足取至於其餘或引據精密或解析通明非無一辭一句之可觀顧其於聖人之微意則非程氏之傳矣隆興改元屏居無事與同志一二入從事於此慨然發憤盡刪餘說及其門人朋友數家之說補緝訂正以為一書目之曰論語要義蓋以為學者之讀是書其文義名物之詳當求之注疏有不可略者若其要義則於此其庶幾焉學者第熟讀而深思之優游涵泳久而不舍必將有以自得於此本既立矣諸家之說有不可廢者徐取而觀之則其支離詭譎亂經害性之說與夫近世出入離遁似是而非之辨皆不能為吾病嗚呼聖人之意其可以言傳者具於是矣其不可以言傳者亦豈外乎是哉深造而自得之特在夫學者加之意而已矣因取凡要義名氏大槩具列如左而序其意云

朱熹論語訓蒙口義 卷

按嘉自序予既序次論語要義以備覽觀暇日又為

兒童讀之大抵諸老先生之為說本非為童子設也

故其訓詁略而義理詳初學者讀之經之文句未能

自通又當遍讀諸說問其指意茫然迷眩殆非啓蒙

之要因為刪錄以成此編本之注疏以通其訓詁參

之釋文以正其音讀然後會之于諸老先生之說以

發其精微一句之義係之本句之下一字之指刻之

本章之左又以平生所聞于師友而得于心思者間

附見一二條焉本末精粗大小詳略無或敢偏廢也

然本其所以作取便于童子之習而已故名之曰訓

蒙口義蓋將藏之家塾俾兒童學焉非敢為他人發

也嗚呼小子來前予幼獲承父師之訓從事于此二

十餘年材資不敏未能有得今乃妄意採掇先儒有所取捨度德量力夫豈所宜然施之故曹取其易曉本非述作以是庶幾其可幸無罪焉爾夫其訓釋之詳且明也日講焉則無不通又義理之精而約也日誦焉則無不識矣通者已知而時習識者未解而勿忘予之始學亦若是而已矣嗚呼小子其懋敬之哉汲汲焉而無欲速也循循然而無敢惰也母牽于俗學而絕之以為迂且淡也母惑于異端而躐之以為近且卑也聖人之言大中正之極而萬世之標準也古之學者其始即此以為學其卒非離此而為道窮理盡性修身齊家推而及人內外一致蓋取諸此而無所不備亦終吾身而已矣舍是而他求夫豈無可觀者然致遠恐泥昔者吾幾陷焉今裁自脫故不願汝曹之為之也嗚呼小子其懋戒之哉

蔡節論語集說 卷

按節進論語集說表曰臣節言臣五月十一日具奏

乞投進所編論語集說奉聖旨許令投進者伏以求

知行之實誠莫切于魯論加講習之功端有裨于聖

學喜數年之編集幸一旦之際逢竊性洙泗垂訓之

書莫非帝王傳道之要存心為大主敬以勝百邪克

己實難為仁以該眾善能博文而約禮復篤志而近

思視明聽聰截然天理人欲之辨直舉枉錯判乎君

子小人之分思君位之至艱畏天命之不易欲如北

辰之眾共當正南面以篤恭權不至于下移禮樂征

伐之自由俗必期于不變德禮刑政之並行常念四

海之困窮用躋羣生于富庶寧非衣而非食庶足國

以足民放鄭聲遠佞人邦政以立舉逸民繼絕世人

心攸歸詳味聖言悉關后德豈惟一王之成式抑亦百代之宏規茲蓋恭遇皇帝陛下性本生知學由特習洞明一貫之旨深省四勿之幾伏願惟精惟一以執中克勤克儉而無間體成湯之罪己簡在帝心法帝堯之則天大茲君道臣干冒天威無任激切屏營之至臣所編輯論語集說二十卷繕寫成一十冊用黃羅夾復封全謹隨表上進以聞臣節惶懼惶恐頓首頓首謹言

按經解序論語集說二十卷宋朝散郎試太府卿兼樞密副都承旨永嘉蔡節編淳祐五年表進于朝今作十卷蓋當日刊于湖賴本已然也是書宋藝文志不載諸家藏書目俱未收予乃購得之幸矣永嘉自伊洛諸儒未作王景山出發明經蘊述儒志一編其後則有劉安節元承鮑若雨高霖謝天申用休潘旻子文周行已恭叔陳經正貴一暨弟經邦貴叙其姓名皆入伊洛淵源錄中而著羣經說者若陳鵬飛少南薛季宣士龍張淳忠甫葉適正則戴溪肖望陳傅良君舉葉味道知道錢文子文李黃仲炎若晦湯建達可陳埴潛室王與之次點皆有成書著錄諺曰溫居瀛壖理學之源不信然與顧諸君子之書或存或亡不可盡得予序蔡氏集說而附及之蓋將以求所未見焉

趙燮論語說 卷

按魏了翁跋自秦漢以後爲語孟者何翅千有餘家稽合同異參訂訛舛亦云麤備極于二程先生以後聖賢之心蓋已暴白庶幾無復餘憾矣廣漢趙君燮一日以論語說一編示余爲之喟然嘆曰聖人之道

如彼衛尊之不禁有味之而知其旨樂焉而不厭者矣又有得涓滴而知之者有不知而唾棄弗顧者令趙君爲之躊躇四顧蓋亦知其可好者充之而至于樂焉則更以勉之

卞圖論語大意 卷

按明都穆跋余家舊藏論語大意及孟子大意二書皆宋刻本而無著書人名嘗觀文獻通考以二書爲卞圖撰亦不書其鄉郡后見劉禹錫嘉話有卞圖跋始知圖爲宋海陵人海陵卽今之泰州余友儲都憲靜夫欲修州志會問以卞圖語之儲君鄂然曰吾用志公事而不知此人修志非君不能益我惜儲君已沒志竟不成念之未嘗不太息也

欽定古今圖書集成理學彙編經籍典

第二百六十六卷目錄

論語部彙考三

漢書藝文志

隋書經籍志

唐書藝文志

宋史藝文志

論語部彙考四

唐陸德明經典釋文

宋鄭樵通志

王應麟漢書藝文志考證

馬端臨文獻通考

經籍典第二百六十六卷

論語部彙考三

漢書藝文志

論語

論語古二十一篇

論語古二十一篇

齊二十二篇

魯二十篇

齊說二十九篇

魯夏侯說二十一篇

魯安昌侯說二十一篇

魯王駿說二十篇

燕傳說三卷

議奏十八篇

孔子家語二十七卷

孔子三朝七篇

孔子徒人圖法二卷

凡論語十二家二百二十九篇

論語者孔子應答弟子時人及弟子相與言而接聞

於夫子之語也當時弟子各有所記夫子既卒門人

相與輯而論纂故謂之論語

齊魯之說傳齊論者昌邑中尉王吉少府宋畸

王陽名家陽成之王陽傳魯論語者常山都尉

翼奮長信少府夏侯勝丞相韋賢魯扶卿前將軍蕭

望之安昌侯張禹皆名家張氏最後而行於世

隋書經籍志

論語

論語十卷

王肅虞翻譙周等注論語各十卷亡

論語九卷

集解論語十卷

集注論語六卷

補闕二卷

論語集義八卷

論語十卷

論語十卷

集解論語十卷

注論語各十卷亡

集解論語十卷

論語七卷

史哀翁尹毅司徒左長史張馮及陽惠明宋新安太

守孔澄之齊員外郎虞遐及許容曹思文注釋僧智

略解梁太史叔明集解陶弘景集注論語各十卷又

論語音二卷徐邈等撰亡

論語難鄭一卷

論語隱義注三卷論語義注三卷亡

論語難鄭一卷

論語標指一卷

論語雜問一卷

論語孔子弟子目錄一卷

論語體略二卷

論語旨序三卷

論語釋疑三卷

論語釋一卷

論語釋疑十卷

三卷王肅撰論語駁序二卷樂肇撰論語隱一卷郭

象撰論語藏集解一卷應琛撰論語釋一卷曹毗撰

論語君子無所爭一卷庾亮撰論語釋一卷李充撰

論語釋一卷庾翼撰論語義一卷王濛撰又蔡系論

語釋一卷張隱論語釋一卷都原通鄭一卷王氏修

鄭錯一卷姜處道論語釋一卷亡

論語別義十卷

法曹張略等撰新書對張論十卷虞喜撰

論語義疏十卷 注 褚仲都撰

論語義疏十卷 注 皇侃撰

論語述義十卷 注 劉炫撰

論語義疏八卷

論語講疏文句義五卷 注 徐孝克撰殘缺

論語義疏二卷 注 張冲撰梁有論語義注圖十二卷

亡

孔叢子七卷 注 陳勝博士孔鮒撰梁有孔志十卷梁

太尉參軍劉被撰亡

孔子家語二十一卷 注 王肅解梁有當家語二卷魏

博士張融撰亡

孔子正言二十卷 注 梁武帝撰

論語者孔子弟子所錄孔子既敘六經講于洙泗之

上門徒三千達者七十其與夫子應答及私相講肄

言合于道或書之于紳或事之無厭仲尼既沒遂緝

而論之謂之論語漢初有齊魯之說其齊人傳者二

十二篇魯人傳者二十篇齊則昌邑中尉王吉少府

宗疇御史大夫貢禹尚書令五鹿充宗膠東庸生魯

則常山都尉龔奮長信少府夏侯勝韋丞相節侯父

子魯扶卿前將軍蕭望之安昌侯張禹並名其學張

禹本授魯論晚講齊論後遂合而考之刪其煩惑除

去齊論問王知道二篇從魯論二十篇爲定號張侯

論當世重之周氏包氏爲之章句馬融又爲之訓又

有古論語與古文尚書同出章句煩省與魯論不異

唯分子張爲二篇故有二十一一篇孔安國爲之傳漢

末鄭元以張侯論爲本參考齊論古論而爲之注魏

司空陳羣太常王肅博士周生烈皆爲義說吏部尚

書何晏又爲集解是後諸儒多爲之注齊論遂亡齊

論先無師說梁陳之時唯鄭元何晏立於國學而鄭

氏甚微周齊鄭學獨立至隋何鄭並行鄭氏盛於人

間其孔叢家語並孔氏所傳仲尼之旨爾推諸書解

古今之意并五經總義附於此篇 注 鄭元何晏

重載於此

唐書藝文志

論語

論語鄭元注十卷

又注論語釋義一卷

論語篇目弟子一卷

王弼釋疑二卷

王肅注論語十卷

又注孔子家語十卷

李充注論語十卷

梁觀注十卷

孟釐注九卷

袁喬注十卷

尹毅注十卷

張氏注十卷

何晏集解十卷

孫綽集解十卷

盈氏集義十卷

江熙集解十卷

徐氏古論語義注諸一卷

虞喜贊鄭元論語注十卷

楊惠明義注十卷

宋明帝補衛瓘論語注十卷

樂肇論語釋十卷

又駁二卷

崔豹大義解十卷

繆播旨序二卷

郭象體略二卷

戴詵述議二十卷

劉炫章句二十卷

皇侃疏十卷

褚仲都講疏十卷

義注隱三卷

維義十三卷

別義十卷

徐逸音二卷

孔叢七卷

王勃次論語十卷

賈公彥論語疏十五卷

韓愈注論語十卷

張籍論語注辨二卷

右論語類三十家三十七部三百二十七卷失姓

名三家韓愈以下不著錄二家十二卷

宋史藝文志

論語

論語十卷 注 何晏等集解

皇侃論語疏十卷

韓愈筆解二卷

陸德明釋文一卷

馬總論語樞要十卷
陳銳論語品類七卷
論語井田圖一卷
邢昺正義十卷
周武集解辨誤十卷
宋咸增注十卷
王令注十卷
紀賈論語摘科辨解十卷
王安石通類一卷
王雱解十卷
孔武仲論語說十卷
呂惠卿論語義十卷
蔡申論語纂十卷
蘇軾解四卷
蘇轍論語拾遺一卷
程頤論語說一卷
劉正客重注論語十卷
陳禾論語傳十卷
晁說之講義五卷
楊時解二卷
謝良佐解十卷
范祖禹論語說二十卷
游酢雜解一卷
龔原論語解一部注卷亡
呂大臨解十卷
尹焞論語解十卷
又說一卷

侯仲良說一卷
鄭浩解十卷
汪革直解十卷
葉夢得釋言十卷
黃祖舜解義十卷
張九成解十卷
吳棫續解十卷
又考異一卷
說例一卷
喻樛玉泉論語學四卷
張杅解十卷
湯烈集程氏說二卷
倪思論語義証二十卷
葉隆古解義十卷
洪興祖論語說十卷
史浩口義二十卷
薛季宜論語小學二卷
林栗論語知新十卷
朱熹論語精義十卷
又集註十卷
集義十卷
或問二十卷
論語註義問答通釋十卷
鄭汝解義十卷
張演魯論明微十卷
意原十卷
錢文子論語傳贊二十卷

王汝猷論語歸趣二十卷
徐燠論語贅言二卷
曾幾論語義二卷
陳儀之講義二卷
姜得平本旨一卷
論語指南一卷注黃祖禹沈大廉明宏辨論
戴溪石鼓答問三卷
東谷論語一卷注不知作者
陳耆卿論語記蒙六卷
孔子家語十卷注魏王肅注
論語元義十卷
論語要義十卷
論語口義十卷
論語展掌疏十卷
論語閱義疏十卷
論語世譜三卷注並不知作者
王居正論語感發十卷
章良史論語探古二十卷
黃幹論語通釋十卷
又論語意原一卷
十圖論語大意二十卷
高瑞叔論語傳一卷
真德秀論語集編二十卷
魏了翁論語要義十卷
右論語類七十三部五百七十九卷注王居正論語感發以下不著錄八部八十二卷

論語部彙考四
唐陸德明經典釋文

論語

鄭元注十卷

王肅注十卷

虞翻注十卷

何晏集解十卷

譙周注十卷字允南巴西人晉散騎常侍不拜陽城亭侯

亭侯

衛瓘注八卷少二卷明帝補闕

崔豹注十卷字正熊燕國人晉尚書左中兵郎

李充集注十卷東晉人

孫綽集注十卷字興公太原公東晉廷尉長樂亭侯

盈氏注十卷不詳何人

孟整注十卷一云孟陋陋字少孤江夏人東晉撫軍參軍不就

梁觀注十卷天水人東晉國子博士

袁喬注十卷字彥叔陳國人東晉益州刺史湘西簡侯

侯

尹綬注十卷

江熙集解十二卷

張馮注十卷字長宗吳人東晉司徒左長史

孔澄之注十卷字仲淵會稽人宋新安太守

虞遐注十卷會稽人齊員外郎

王弼釋疑三卷

樂肇釋疑十卷

徐邈音一卷

右論語皇侃撰義疏行於世
宋鄭樵通志

論語

古文論語十卷注鄭元注

古論語義注注請一卷注徐氏

右古論語二部十一卷

蔡邕今文石經論語二卷

右正經一部二卷

論語十卷注鄭元

論語十卷注王肅

論語七卷注盧氏

論語十卷注晉著作郎李充

論語十卷注梁觀

論語九卷注孟釐

論語十卷注袁喬

論語十卷注尹毅

論語十卷注張氏

論語十卷注韓愈

集解論語十卷注何晏

集註論語六卷注衛瓘

論語集義八卷注晉尚書左中兵郎崔豹

集解論語十卷注晉兗州別駕江熙

盈氏集義十卷

集解論語十卷注晉孫綽

續注論語十卷注史辟原

贊鄭元注十卷注虞喜

補衛瓘注十卷注宋明帝

右注解十九部百八十卷

論語章句二十卷注劉炫

論語講疏文句義五卷注徐孝克

右章句二部二十五卷

論語別義十卷注范廩

論語義疏十卷注褚仲都

論語義疏十卷注梁皇侃

論語大義解十卷注崔豹

論語述義十卷注劉炫

論語義疏八卷

論語義疏二卷注張冲

論語述義二十卷注戴詵

雜義十三卷

別義十卷

論語正義十卷注宋朝邢昺

論語展掌疏十卷

右義疏十二部一百二十三卷

論語難鄭一卷

論語標指一卷注司馬氏

論語雜問一卷

論語體略二卷注晉郭象

論語旨序三卷注晉繆播

論語釋疑三卷注王弼

論語釋一卷注張惠

論語釋疑十卷注晉樂肇

論語駁三卷注樂肇

論語義注隱三卷

論語陳說一卷注 僧贊寧

論語筆解二卷注 韓愈

論語樞要十卷

論語元義二卷

右論難十四部四十三卷

論語刊誤二卷注 李涪

論語辨十卷注 周式

右論語辨正二部十二卷

論語孔子弟子目錄一卷注 鄭元

論語撰人名一卷

論語世譜一卷

右名氏譜三部三卷

論語音二卷注 徐邈

論語釋文十一卷

右音釋二部十三卷

論語識八卷

右識緯一部八卷

孔叢子七卷注 陳勝博士孔鮒撰

孔志十卷注 梁劉昫撰

孔叢子釋文一卷注 宋咸

孔子家語二十一卷注 王肅注

富家語二卷注 魏博士張融撰

孔子正言二十卷注 梁武帝

次論語十卷注 王勃撰

右續語七部七十一卷

凡論語十一種六十五部四百八十二卷

王應麟漢書藝文志考證

論語

論語古二十一篇出孔子壁中兩子張 如淳曰分堯曰篇後子張問何如可以從政已下爲篇名曰從政

家語後序云孔安國爲古文論語訓二十一篇何晏序云古論唯博士孔安國爲之訓解而世不傳新論云文異者四百餘字正義曰孔子舊宅壁中得古文經傳即謂論語孝經爲傳也古文者科斗書蒼頡本體周所用以今所不識故名古文春秋正義引哀公問主於宰我案古論語及孔鄭皆以爲社主張包周等並爲廟主釋文云不知命無以爲君子也魯論無此章今從古說文引狐貉之厚衣長短右袂色字如也文質份份不使勝食既朝服衽身焉善射小人窮斯繼譚曰禱爾於上下神祇友福倭以杖荷篠有荷臬而過孔氏之門昇湯舟皆古文也注 又引論語路予之足齊二十二篇多問王知道

晁氏公武曰齊論有問王知道兩篇詳其名是必論內聖之道外王之業未必非夫子之最致意者曰張侯論爲世所貴本傳禹爲成帝師以上好論語難數對已問經爲論語章句獻之鄭元以張侯論爲本參考齊古而爲之法

孔子家語二十七篇注 師古曰非今所有家語馬昭謂今家語王肅增加非鄭元所見注 肅私定以難元

孔子三朝七卷

劉向別錄云孔子見魯哀公問政比三朝退而爲

此記凡七篇並入大戴禮蜀志秦宓曰昔孔子三見哀公言成七卷裴松之注案中經傳有孔子三朝八卷一卷目錄餘者所謂七篇注 七篇今攷大戴禮千本四代虞德詒志小辨用兵少問史記漢書文選注所引謂之三朝記爾雅疏張揖引禮三朝記皆此書也

孔子徒人圖法

太史公曰弟子籍出孔氏古文近是史記孟子世家弟子蓋三千焉身通六藝者七十二人索隱云史記自子石以右三十五人顯有年名及受業聞見於書傳其四十有二人無年及不見書傳家語此例唯有三十七人注 史記所傳七十有七家語所錄七十有六

其公良孺秦商顏亥叔仲會四人家語有事迹史記闕然自公伯察秦冉鄒單三人家語不載而別有琴牢不知何說而張禹獨遺之禹身不知王鳳之邪正其不知此固宜然勢位足以軒輊一世使斯文遂喪惜哉何晏序云鄭元就魯論篇章考之齊古爲之註文軒林氏曰康成溺於章句其意定未必審也許氏說文有所謂逸論語是康成之說未行而論語散逸已有不傳者注 說文逸論語曰玉漿之瑟今其瓊猛也如玉之瑩又曰瓊璫魯寶玉也孔子曰美哉瓊璫遠而望之與若也近而視之瑟若也一則理勝二則乎勝初學記亦謂逸論語之文愚謂問玉疑即問玉也篆文相似季氏篇洪氏曰或以爲齊論正義曰齊人所傳魯二十篇

釋文曰鄭校周之本以齊古讀正凡五十事皇覽引魯讀六事正義曰魯論者魯人所傳即今所行篇次是也石經論語載孟毛包周有無不同之說其文有增損者其字亦有假借及用古者有字異而訓不遠若置其杖賈之哉者後漢傳有遵五達四之文祝睦碑云鄉黨遠劉修碑云鄉黨遠邇如也古今人表卑湛尾生高尾生晦厥黨童子祝佗華子成弗盼廣韻引子西彼哉彼義切集韻引懷爾捨瑟而作

魯安昌侯說二十一篇

何晏序云張禹本受魯論兼講齊說善者從之

馬端臨文獻通考

經籍考

何晏論語注十卷

晁氏曰魏何晏集解其自序云據魯論包咸周氏孔安國馬融鄭康成陳羣王肅周生烈八家之說與孫邕鄭冲曹義荀爽諸家訓解爲之按漢時論語凡有三而齊論有問王知道兩篇詳其名當是必論內聖之道外王之業未必非夫子之最致意者不知何說而張禹獨遺之禹身不知王鳳之邪正其不知此固宜然勢位足以軒輊一世使斯文遂喪惜哉

按齊論多於魯論二篇曰問王知道史稱爲張禹所刪以此遂無傳且夫子之言禹何人而敢刪之然古論語與古文尚書同自孔壁出者章句與魯論不異唯分堯曰子張問以下爲一篇共二十一篇則問王知道二篇亦孔壁中所無度必後儒依

倣而作非聖經之本真此所以不傳非禹所能刪也

皇侃論語疏十卷

晁氏曰梁皇侃撰古今論語之註多矣何晏集七家復采古論語註爲集解行於世侃今又引衛瓘繆播樂肇郭象蔡謨袁宏江惇蔡奚李充孫綽周懷范寧王珉凡十三家之說成此書其序釋江熙所集世謂其引事雖時詭異而援證精博爲後學所宗云

韓李論語筆解十卷

晁氏曰唐韓愈退之李翱習之撰前有祕書丞許勃序云韓李相與講論共成此書按唐人通經者寡獨兩公名冠一代蓋以此然四庫邯鄲書目皆無之獨田氏書目有韓愈論語十卷筆解兩卷此書題曰筆解而兩卷亦不同

陳氏曰館閣書目云祕書丞許勃爲之序今本乃王存序云得於錢塘汪充而無許序

石經論語十卷

晁氏曰石經蜀張德鈞書闕唐諱立石當在孟知祥未叛之前其文脫兩字誤一字又述而第七舉一隅下有而示之三字二人行必有我師焉上又有我字衛靈公第十五敬其事而後其食作後食其祿與李鷄本不同者此也

論語井田義圖 卷

崇文總目不著撰人名氏述周井田之法其曰論語者蓋爲論語學者引用云

論語正義十卷

晁氏曰皇朝邢昺等撰亦因皇侃所採諸儒之說刊定而成書

陳氏曰唐人止爲五經疏而不及孝經論語至葛始奉詔爲之

按唐藝文志亦有賈公彥論語疏十五卷當攷王令論語十卷

晁氏曰皇朝王令遂源撰解堯曰篇云四海不窮困則天祿不永終矣王安石書新義取之

王介甫論語解十卷王元澤曰義十卷陳用之論語十卷

晁氏曰王介甫撰并其子雱口義其徒陳用之解紹聖後皆行於場屋或曰用之書乃鄒浩所著託之用之云

東坡論語解十卷類演論語拾遺 卷

類演自序予少爲論語解于瞻謫居黃州爲論語說盡取以往今見於書十二三也大觀丁亥閑居

穎川爲孫籍簡筠講論語于瞻之說意有所未安時爲籍等言凡二十七章謂之論語拾遺恨不得質之于瞻也

晁氏曰蘇軾于瞻爲論語解沒後子由以其說之未安者辯正之

伊川論語說十卷

晁氏曰伊川門人記其師所解論語也不爲文辭直以俚語記之

范醇夫論語說十卷

晁氏曰元祐中所進數稱引劉敞程頤之說

謝顯道論語解十卷

謝顯道論語解十卷